



Sud Bosne i Hercegovine
Sud Bosne i Hecegovine

Broj: S1 3 Iž 043484 22 Iž
Sarajevo, 11.08.2022. godine

Sud Bosne i Hercegovine, u vijeću Apelacionog odijeljenja sastavljenom od sudija Zvezdane Antonović, predsjednika vijeća, Dinke Bešlagić-Čovrk i Mirka Božovića, članova vijeća, odlučujući o žalbi Ismeta Mulašaćirović, ... Š., izjavljenoj protiv Odluke Centralne izborne komisije Bosne i Hercegovine broj: 06-1-07-1-608-3/22 od 04.08.2022. godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Opće izbore 2022. godine, u nejavnoj sjednici, održanoj dana 11.08.2022. godine, donio je

R J E Š E N J E

Žalba se odbija.

O b r a z l o Ź e n j e

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Opće izbore 2022. godine po podnesenim prijavama do 19.07.2022. godine, jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine. U odnosu na žalitelja odbijen je upis iz razloga što prijave PRP-1 nije vlastoručno potpisao i što nije dostavio validan dokaz o adresi boravišta u inostranstvu.

Žalitelj je protiv navedene odluke blagovremeno izjavio žalbu navodeći da nije dostavio adresu u Švedskoj jer ni u jednom validnom državnom dokumentu ne postoji upisana adresa, a da je adresu poslao sa dokumenta Poreske uprave.

Centralna izborna komisija Bosne i Hercegovine je dostavila ovom sudu odgovor na žalbu u kojem predlaže da se izjavljena žalba odbije kao neosnovana.

Ispitujući pobijanu odluku u okviru žalbenih navoda, vijeće Apelacionog odjeljenja Suda Bosne i Hercegovine je zaključilo da žalba nije osnovana.

Prema stanju u spisu ovo vijeće konstatuje da je Centralna izborna komisija BiH, prije donošenja ožalbene odluke, a prilikom razmatranja prijave Ismeta Mulašaćirović, koja je upućena elektronskim putem u skaldu sa Uputstvom o

postupku slanja, prijema, obrade, arhiviranja i zaštite elektronskih prijava državljana Bosne i Hercegovine za glasanje izvan BiH elektronskim putem („Službeni glasnik BiH“ broj: 27/22), dana 12.07.2022. godine za glasanje izvan BiH, uočila da podnositelj prijave za glasanje izvan BiH nije priložio ispravan i potpun obrazac jer ga nije svojeručno potpisao, te što nije dostavio validan dokaz o adresi boravišta u inostranstvu.

Postupajući na način opisan u prednje utvrđenom činjeničnom stanju, podnositelj žalbe je postupio suprotno odredbi člana 3.15 stav (2) Izbornog zakona BiH („Službeni glasnik BiH“, broj 23/01 do 51/22), kojom je propisano da državljanin BiH koji privremeno živi u inostranstvu, a ima biračko pravo u skladu sa Zakonom i koji je upisan u Centralni birački spisak, da bi se nalazio u izvodu iz Centralnog biračkog spiska za glasanje van BiH, dužan je da za svake izbore podnese prijavu Centralnoj izbornoj komisiji BiH. Prijava mora biti zaprimljena u Centralnu izbornu komisiju BiH prije roka koji odredi Centralna izborna komisija BiH, u periodu nakon raspisivanja izbora. Uz popunjenu i potpisanu prijavu podnosilac prilaže i dokaz o identitetu i podatke o tačnoj adresi u inostranstvu, te izjašnjenje o opciji glasanja u diplomatsko-konzularnom predstavništvu ili putem pošte.

Centralna izborna komisija BiH je u skladu sa članom 3.15 stav 1. Izbornog zakona BiH odredila rok do 19.07.2022. godine u 24,00 sata za prijem prijava za upis u birača u izvod iz Centralnog biračkog spiska za glasanje izvan BiH za Opće izbore 2022. godine. Žalitelj je imao mogućnost da se putem internet stranice i info linije Centralne izborne komisije BiH informiše o statusu njegove prijave koju je poslao 12.07.2022. godine i na taj način otkloni nedostatak koji se ogleda u činjenici da obrazac prijave PRP nije svojeručno potpisao te što nije dostavio validan dokaz o adresi boravišta u inostranstvu. Žalitelju je poslata obavijest o navedenim nedostacima koje nije otklonio u datom roku od dva dana.

Napomene radi, žalitelju nije oduzeto biračko pravo za Opće izbore 2022. godine, nego samo mogućnost glasanja putem pošte izvan BiH, jer isti može glasati na redovnom biračkom mjestu u općini u kojoj ima prijavljeno prebivalište u BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA
S U D I J A
Zvezdana Antonović**